

Tuesday, May 27, 2025

Time - 2:30pm

SOCIAL WELFARE MINISTER

Social Welfare Minister Pi Lalrinpuii’n ruihhlo ngai te chu ram hmelma leh misual an ni lo a, anmahni ringawta talchhuah an harsat avangin puitu an mamawh tih a sawi. Vawiina Social Welfare Department leh Directorate of Ayush tangkawpin an buatsaih a thlawna kum upa leh ruihhlo ngai te tana rilru lam harsatna inentirna, Dawrpui Multipurpose Centre, Aizawla buatsaih a telpuinaah he thu hi a sawi a. Minister chuan ruihhlo ngai tam tak, thlanmual leh hmun hrang hrangah an punkhawm thu leh a khawngaih takzet thu a sawi a. Ruihhlo avanga harsatna tawkte enkawl dan tur pawh tunhnaiah sorkarin ngawrh takin a ngaihtuah tih a sawi a. Ruihhlo ngai te lo tuamhlawmna tur hulhliap ruahman tum a nih thu leh hetah hian lo bual fai a, chaw ei tur te lo pek an nih dawn thu a sawi a. Ruihhlo avanga harsatna chu sorkar, kohhran, home leh pawl ang chauha chin fel theih a nih loh thu a sawi a, kawng hrang hranga tangruala beih a ngai a ni a ti.

Minister chuan kum upate leh ruihhlo ngaite puala rilru lama harsatna nei te tana a thlawna inentirna buatsaih a ni chu lawmawm a tih thu a sawi a. An sorkar tirhah kum upate hamthatna dawn thin tihpun chu an intiam anga an tih hlawhtlin tawh thu a sawi a. Kum upa te tana Zoram nuam chu ban phak maia awm a nih thu sawiin sorkar chuan theihtawp a chhuah zel dawn thu a sawi a ni.

Vawiina Free Mental Health Clinic puala inkhawm tawi buatsaihah hian kum upa te hamthatna hrang hrang leh kum upate enkawl dan chungchang inzirtir a ni a, rilru hriselna, AYUSH chungchang leh ruihhlo hman sual leh a kaihnawih chungchang inzirtir a ni baw k a. Department pahnih thawktute bakah nursing school zir laite an tel a ni.



ZPM PRESS CONF

ZPM Spokesperson Pu K. Laltluangkima’n sorkarin sawhthing lei mekah khawvel puma a rate a chhiat avangin sorkar a buai phah hle tih a sawi.

Vawiina Aizawl Press Club-a chanchinbumite kawmnaah he thu hi sawiin Pu K. Laltluangkima chuan ZPM chuan thlai thar 4 thlangin man man taka lo neituten an hralh theihna turin a market an buaipui tur thu an lo sawi tawh tih a sawi a. An thlai thlan zingah Aieng leh hmarcha chu buaipui tham vak a awm loh thu sawiin Hmunphiah erawh tlema an buaipui nasat thu leh fel fai taka hralh zawh vek a nih thu a sawi a. Sawhthing chu an buaipui nasa tih sawiin khawvel puma rate chhia vanga an buai thu leh vanduaithlak an tih thu a sawi a. Sorkar chuan kumin June thla thleng a la lei zel dawn thu leh tunah pawh a lei mup mup mek reng thu a sawi a ni.

Pu K.Laltluangkima chuan sawhthing lei chungchangah khaw hrang hrang zingah thu awih deuhin an vanneihpui thu sawiin khaw thuawih lo deuh chuan an tuar a ti a, sorkar thu awiha sawhthing chawh theih hun an tiha cho thin khuain an hlawkpui thu sawiin Hun lo kal zel turah pawh lo neituten sorkar thu ngaihchan thiaman an thu awih a pawimawh tih sawiin Sawhthing lei runpui chu vawikhat tihna a nih thu leh hei hi mel lung pawimawh Mizo mipui ten an hriat reng tawh tur a nih thu a sawi a. Tun hma ngaihtuah chuan hmasawmna nasa tak a nih thu sawiin duhthu anla sam tawkhloh lai erawh a awm a ti a, an kalphung chu a kum tela a that chhoh zel an beisei thu a sawi baw k.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah thin a ni. Zanin dar 6 leh a chanve-ah Chanchinthar puan leh a ni ang.



CYMA

Central YMA hnuaia ruihhlo do pawl, Central Anti-Drugs Squad (CADS) leh Excise & Narcotics Department te chuan Pathianni kal ta zan leh nimin Thawhtanni zing dar 1 ah Phunchawng leh Luangmualah heroin (No. 4) a vaiin hawng 190 leh methamphetamine an man.

Central YMA hnuaia ruihhlo do pawl, Central Anti-Drugs Squad (CADS) leh Excise & Narcotics Department te chuan Pathianni zan dar 7:40 khan Phunchawng-ah Heroin (No.4) Hawng 50 (grams 549) an man a, a neitu a puh C. Lalramnunmawii, Chanmari West-a khawsa ni a inchhal leh Lalnunmawia, Tuikual North veng nia inchhal te an man a, Hemi kaihhnawihah hian Thawhtanni zing dar 1:00-ah Luangmual Industrial Complex-ah Heroin Kg 1 leh Gram 549 (Hawng 140) leh Methamphetamine Kg 9 leh Gram 817 man leh a ni a, Ruihhlo an man zawng zawng hi Heroin Kg 2 leh Gram 98; Methamphetamine Kg 9 leh Grams 817 a ni.

Heng bakah hian lirthei 1 leh ruihhlo kaihhnawih a an hman Mobile Phone pahnih te man tel a ni bawk a. Excise & Narcotics Department ten thubuai an siam sak nghal a ni.

Central YMA hnuaia Kumpuan Sub-Committee leh Central Anti-Drugs Squad (CADS) in kumin, January 1 atanga nimin thlengin Heroin (No. 4) : Hawng 839, Heroin (No. 4) : Tictac bur 1,469, Damdawi ruihtheih AP, Trama leh adangte.- mum 26,623, Ganja : kg 72, Codein : bur 2,232, Sap zu :bur 69, local zu bur 364 leh beer can 54 a ni a. Ruihhlo kaihhnawia mihring man zat hi 737 an ni a, heng zingah hian Counselling pek zat 285, Home/Centre-a dah luh zat 73, Excise & Narcotics Department kuta pek 74 leh Police kuta pek 5 an awm a ni.

Central Anti-Drugs Squad hi Mizoram Synod hnuaia Social Front atangin Counsellor pek an ni a, nitinin heng ruihhlo kaihhnawiah man te hi Central YMA Building-ah Counsellor pek thin an ni.



LAWNGTLAI EXCISE

Lawngtlai Excise & Narcotics Department chuan thla hnih chhunga tualchhunga siam, Zu an man Cheng Nuai 17 sing 6 man hu chu vawiin khan an paih.

Lawngtlai Excise zu man hi kumin April leh May thla chhunga an man niin fun 220 a vaiin Litres 2200 a ni a, April leh May thla chhung hian Ganja Kg 4 cheng 45,000/- man hu leh Heroin cheng sing 30,000/- man hu an man bawk.

Officer in charge Pu Lalrengpuia chuan Central Young Lai Association hnuaia ruihhlo dotute nen thawhhona thatak an nei tih sawiin, YLA hmalakna chu chhuanawm a tih thu a sawi a, Heroin pawh tualchhungah man tur a awm fo tih sawiin, tualchhung mi te nen thawhhona tha tak an neih a pawimawh thu a sawi.

Tun dinhmunah Excise & Narcotics Station Lawngtlai ah hian thawktu mi sawm pakhat an awm mek a ni.

